

Xiomara Maduro(MEP):

No lubida cu Eman a bende e cuero di e baca caba desde 2013

ORANJESTAD – Awor cu tin bon noticia pa trece pa Pueblo riba e deal cu CITGO pa e refineria, diripiente nos Minister President ta na Aruba pa haci anuncio di e noticia positivo aki. Pero ni un dia despues ata informacion ta circula cu ta trece duda si di berdad a yega na un deal cu CITGO. Con cu sea, Pueblo no mester lubida cu Minister Eman a bende e cuero di e baca caba na 2013 na momento cu a cera un MOU entre Gobierno di Aruba, Utilities, GasUnie, Shell y Anthony Veder pa establecer na Aruba un transshipment di LNG na e waf di Valero. Pues Pueblo mester tene na cuenta cu Eman su intencion no ta e reapertura di e refineria, pero mas bien lo kier reemplaza e refineria pa pone un planta di LNG na su lugá.

E cuero a wordo bendi na 2013

Cu masha tantam Minister Eman a anuncia na mei 2013, cu Pais Aruba y Utilities Aru-

ba N.V. a firma un MOU cu Shell, Gasunie y Anthony Veder pa institui na Aruba un centro di excelencia pa eliminá uzo di fuel oil como combustibel pa produccion di awa y electricidad y reemplaza esaki cu LNG, gas natural likido. Segun e mandatario a informa e tempo ey, Aruba lo haya un transshipment y un hub pa loke ta trata provision di LNG tanto pa necesidad di Aruba mes como tambe pa e region Caribense. Minister Eman a indica cu e posibilidad t'ey cu na Aruba nos por haya un establecimiento caminda ta bay tin un gran cantidad di LNG. Esaki ta sea den un tankero cu ta wordo mara na e piernan na Valero of un tanki riba tera. Pues cu otro palabra, ya na 2013 Minister Eman a cera deal cu entre otro Shell pa locual ta bira e destino di e tereno y e facilidad di e refineria.

E cuero di e baca a wordo bendi y p'esey Minister Eman desde comienso no tabata interesa pa yuda busca un cumprado pa e refineria. Ta bisto cu e mandatario cu a bende e cuero di e baca caba, tabata mas interesa den ki beneficio

e y su hendenan cerca lo por saca di un deal asina hunto cu Shell y Gas Unie. Pa no papia mes di e negoshi rondo cu lo mester tin cu e desmantelacion y e terenan di e refineria cu lo mester cay den man di e famia cu ta hayando casi tur tereno comercial na Aruba.

Dilema di Eman

Ta esaki ta e dilema cu Minister Eman a papia di dje na momento cu e negociacion nan cu CITGO a bira mas serio y cu e mandatario mester a core bay reuni na Hulanda cu Minister Koenders. E dilema di Eman no ta entre haya un inyeccion di entrada pa Pais Aruba si e refineria habri of busca un solucion mas duradero pa San Nicolas manera e mandatario a indica. E dilema real ta e deal cu na 2013 ya a wordo cera cu Shell y GasUnie. Ta esaki ta e motibo pa kico Minister Eman tabata asina desinteresada den apertura di e refineria. Si ta pa Minister Eman e refineria no ta habri mas y na su lugá mester bin un planta di LNG conforme e deal cera na 2013.



Mas sinceridad

Como Minister President di Aruba, Minister Eman mester ta mas sincero cu nos Pueblo riba e topico di e refineria. Minister Eman desde cu a anuncia e MOU cu Shell y GasUnie nunca

mas a duna informacion riba esaki. Ni ora cu no sa haci e preguntanan oficial riba esaki for di Parlamento. E tempo nos dilanti lo mustra Pueblo e intencion real di Minister Eman y lo corda nos pa no lubida cu Eman a bende e cuero di e baca caba desde 2013. □

Minister Mike de Meza:

Inversion di Citgo Petroleum Corporation na Aruba ta entre 700 milyon y 1 biyon dollar

ORANJESTAD – 700 milyon dollar ta e inversion minimo cu Citgo Petroleum Corporation ta bay realisa riba e facilidadnan na San Nicolas pa converti esaki den un 'upgrader' di crudo. Asina Minister di Energia, Ing. Mike de Meza a splica miembronan di prensa. E cifra exacto ta dificil pa bisa mirando cu ta despues cu e trabounan cuminsa y avansa, lo tin un idea mas detaya.

Un parti di e inversion aki ta un sistema di suministro di gas cu ta core for di tereno enorme na Venezuela y lo yega Aruba bou di lama. E proyecto aki ta forma parti di e exigencia di parti di Gobierno di Aruba pa e planta ta uno mas 'green' den su forma di opera.

Minister de Meza ta admiti cu "e inversion ta uno basta cuantioso." Riba papel e ta casi un biyon dollar, pero ta na momento cu bay aden y



haci un inspeccion hopi mas detaya y cuminsa traha riba paketenan cu ta bay ehecuta, e ora ta haya e cifra final cu ta mas specifico. "E lo ta minimo 700 milyon dollar," asina e titular di energia a indica.

Tambe a splica cu e gas ta bin for di e tereno grandi cu yama 'Perla 4 Cardon' y ta ubica den e awanan territorial di Venezuela. For di eynan ta core un liña di gas bou awa dirigi pa e area di Cardon den Peninsula di Paraguaná. Di eynan e ta drenta lama bek direccion Aruba y ta subi

banda di e refineria.

Manera anuncia anteriormente, un di exigencianan estableci dor di Gobierno di Aruba na CITGO, ta pa e planta opera di e manera mas ecologico cu por. E uzo di gas ta acopla na un proyecto di 'Carbon Capture' caminda ta coy e emision di carbon cu normalmente ta bay den atmosfera. Den e caso aki ta uza e material emiti pa cultivo di alga cu, na su turno ta wordo uza como un recurso sostenibel den fabricacion di otro productonan; por ehempel, cosmetica y habon. □

Alan Howell(AVP):

Aruba ta contento cu e refineria lo habri bek

ORANJESTAD - Recientemente nos tur por a presencia cu Minister de Meza a anuncia cu hopi emocion cu nos Refineria lo habri bek. Unda cu bo bay por a scucha cu pueblo ta sumamente contento cu e noticia aki. Pero na San Nicolas e celebracion tabata sumamente grandi. Cu e logro di habri e refineria San Nicolas lo haya un bida bek sigur.

Hopi tata di famianan a keda sumamente contento cu e noticia aki. Sin papia di e tatanan cu ta trahando den exterior, cu tin posibilidad nan grandi pa bolbe bek cas cerca nan famia. Ta un deber di un gobierno pa zorg y crea di tur manera cu ta posibel, posibilidad di trabou na su pais cu e ta gobernando. Pa motibo aki gobierno a cumpli grandemente cu un di su debernan. Un pabien y tur elogio pa Gobierno, Minister de Meza y su team.

Alan ta contento sigur, sigur pa Aruba y mas ainda pa nos di San Nicolas. Cu un poco pasenshi Alan ta convenci cu habitantenan di San Nicolas lo haya y tin tur cos cu nan merece di tin. Alan a termina manera e hobennan ta bisa "Awo tin cos". □

BON DIA *Aruba*

Pa AVISO den nos Corant

aviso@bondia.com